


**NIIZHWAASWI
ANISHINAABE-
GIKINOO'AMAADIWINAN**



NIIZHWAASWI ANISHINAABE- GIKINOO'AMAADIWINAN

Enaakonigewinikejig Ontario ogikendaanaawaa ningoji eyaawaad Misi-zaagi-Anishinaabe-akiing, Huron-Wendat-akiing, Anishinaabe-akiing miinawaa Haundenosaunee-akiing. Noongom, Ontario niibiwa Anishinaabeg daawag omaa miinawaa nimiigwechiwendaamin wii-onji-anokiiyaang omaa miinawaa wii-onji-bimaadiziyaang omaa.

Azhigwa gichi-gabeyi'ii, Anishinaabeg maada'ookiiwag odinaadiziwiniwaan miinawaa odebwetamowiniwaan apii dibaajimowaad. Enaakonigewinikejig miigwechiwendamoog etenig ozhikwajigan imaa ozhikwajiganing Niizhwaaswi Anishinaabe-Gikinoo'amaadiwinan imaa biindig Inaakonigewinikewigamigong, miinawaa maada'ookiing dibaadodaming onow Anishinaabe-Gikinoo'amaadiwinan waa-nandagikendaming Ontario. Niwaabandaamin miinawaa nimanaadendaamin gaa-wanitoongiban miinawaa niwii-nanaa'itoomin ji-nisidotaming gikinoo'amaageng miinawaa gaganooniding Anishinaabeg miinawaa Wayaabishkiiwejig miinawaa oodenawan.



ETEGIN

OZHIKWAJIGANAN

INAAKONIGEWINIKEWIGAMIGONG

Gegaa azhigwa 130 daso-biboon, Ontario's Inaakonigewinikewigamig gaa-onji-ayaawaad anooj dowaaq bemaadizijig wii-inaakonigewaaban. Iw waakaa'iganing mino-bimaadiziwin miinawaa anooj menonaagwakin ozhikwajiganan. Gaa-onji-ozhichigaadegin ozhikwajiganan medieval izhi-ozhigewin, gargoyles miinawaa manidoog aadizookaanag wenji-izhinaagoziwaad ji-zegi'aawaad maji-manidoon, megwaa Latin ozhibii'igewinan wenji-ozhibii'igaadegin imaa okijaabikong ji-minwaakonigeng. Onow ayi'iin minonaagwadoon miinawaa gichi-onji-apiitendaagwadoon gaa-izhiwebak, gaawiin dash odazhiikanziinaawaan Anishinaabeg Ontario. Gii-nandongem ji-achigaadeg oshki-ozhikwajigan ji-biijigaadeg Anishinaabe-bimaadiziwin imaa biindig Inaakonigewinikewigamigong. Garrett Nahdee gii-nitaa-mazinibii'ige go gii-gikenimind aapiji, iw gaa-ozhitood ozhikwajigan imaa Niizhwaaswi Anishinaabe-Gikinoo'amaadiwinan odoozhikwajiganing ji-mikwendaming apane gaa-izhiwebiziwaaban Anishinaabeg Ontario miinawaa ezhinaakwak oshki-wiijiindiwinan, inawendiwinan, miinawaa izhichigewinan ozhichigaadewan noongom.



MEZINIBII'IGED GARRETT NAHDEE

Garrett Nahdee gaa-gikinoo'amaadizod netaa-mazinibii'iged Bakejiwanaang Walpole Island First Nation onjibaa.

Marine gii-aawi Gichi-Mookomaan-Akiing niyo-biboon, gii-minochige gii-naadamaaged. Ishkwaataad imaa ishkwaamanaadendaagozid Marines, naano-biboon gii-odaabii'iwe gichi-odaabaaning, gii-babaamaadizi miziwe Canada miinawaa United States. Odoodaabaaning nitam gii-maajii-mazinibii'ige.

Gii-maajii-nisidotam gii-zaagitood mazinibii'iged, wayiiba gii-maajii-zhishoobii'ige miinawaa gaa-maajii-ozhikwajige. Gii-maajii-gagwejimaa giishpin waa-ozhitooban mazinibii'iganan ozhikwajiganan, mii sa ezhichiged noongom apane go.

Iniw Niizhwaaswi Anishinaabe-Gikinoo'amaadiwinan, Garrett ikido "aapiji onizhishinon izhiwebiziwinan, miinawaa apii aabajichigaadegin endaso-giizhig, giga-waabandaan aandaadiziyan. Zanagiziwinan da-maajaamagadoon, miinawaa zhiingendamowinan da-maajaamagadoon. Giga-ombendam gijichaag ji-minoseyan wii-maajiishkaayan. Aapiji nindebwetaanan Niizhwaaswi Anishinaabe-Gikinoo'amaadiwinan, miinawaa ningikinoo'amaagenan apii gashkitooyaan.

Gii-ikido "Nitam sa maaba migizi, Zaagi'idiwin aawi. Megwaa bimaadizid awiya Zaagi'iwed, awiya oga-ayaan iw Manaadendamowin, miinawaa Zaagi'iwed ji-manaadenimaad gakina awiya. Mii dash Zaagi'idiwin miinawaa Manaadendamowin, wenji-bimaadiziyang Debwewining. Debweyenindizong ji-biijigaadeg Dabasenimowin. Dabasenimowin dibishkoo izhinaagwad Nibwaakaawin. Nibwaakaawin gikendaasowin aawan, ginaadamaagon ji-bekaadiziyan. Apii ishkwaaj, daa-ate Aakide'ewin ji-gwayakwaadizing, Aakide'ewin ji-ganawendaming Gwayakwaadiziwin, Aakide'ewin apane ji-manaadendamowin miinawaa ji-zaagitoong gakina gegoo Akiing."



NIIZHWAASWI ANISHINAABE- GIKINOO'AMAADIWINAN

Niizhwaaswi Anishinaabe-Gikinoo'amaadiwinan izhi-aawanoon ji-naadamaagowaad Anishinaabeg ji-mino-bimaadiziwaad. Gii-maamaada'oonidim apane go gichi-niibina daso-biboon apii dibaajimotaading miinawaa manidookeng.

Igiw Niishwaaswi Gigte-mishoomisinaabaniig ogii-miinigowaan Manidoon ji-akawaabamaawaad Anishinaaben. Ogii-waabandaanaawaa bimaadiziwin gaawiin gaa-onizhishinzininig, mii dash gaa-maajinaazha'waawaad waa-naadamaagenid, oshkaabewisan, ji-awi-wiiosemaanid Anishinaaben miinawaa ji-biidamawaanid awiya ji-gikinoo'amaagozinid awiya waa-izhi-mino-bimaadizinid akiing. Niizhwaaching mii dash aw oshkaabewis gaa-biinaad abinoojiinsan miinawaa gii-minwendamoog Anishinaabeg. Ogii-inaawaan oshkaabewisan ji-maajiinaanid abinoojiinsan gakina ningoji akiing ji-waabandaminid gakina gegoo. Megwaa niizhwaaso-biboon miinawaa apii gii-bi-ayaawaad, igiw gigte-mishoomisinaabaniig bebezhiig ogii-miinaawaan iniw abinoojiinsan – gikinoo'amaadiwin – ji-maada'oonaanid Anishinaaben.



ZAAGI'IDIWIN

Zaagi'idiwin wenipazh maada'ooniding miinawaa wenipazh miigiweng. Apii miigiweyang zaagi'idiwin wenipazh, neyaab da-bi-ayaamagad – maanda inagakeyaa miiniding miinawaa maada'ooniding. Zaagi'idiwin gakina ningoji, bemaadizijig miinawaa bakaan awiya. Zaagi'idiwin ezhi-waabanda'ang aw migizi, gichi-waasa ogashkitoon babaamised miinawaa bemiwidood gakina gikinoo'amaagewinan imaa niwin inagakeyi'iin akiing.




DEBWEWIN

Debwewin ezhi-dibaadodaming eta go gaa-izhi-bimaadizing gaa-izhiwebizing, gego maji-doodaadizoken gemaa gaye awiya. Debwewin ezhi-waabanda'ang aw mishiikenh, gaa-ayaad gii-ozhichigaadenig aki miinawaa gikinoo'amaagewinan obimoondaanan. Inaadizid bezikaad miinawaa nibwaakaad, mishiikenh ogikendaanan babaamaadiziwin miinawaa waa-izhaang ningoji.

NIBWAAKAAWIN

Nibwaakaawin aabajichigaade ji-mino-izhiwebiziwaad gakina bemaadizijig – zaagitoong gikendamowin mii dash gikendaming nibwaakaawin. Nibwaakaawin ezhi-waabanda'ang aw amik, ezhi-bimaadizid giinaabided nibwaakaad ji-dadaakwamaad mitigoon miinawaa wadikwan ji-okonimiked.





DABASENIMOWIN

Dabasenimowin ezhi-gikenindizoyan ezhi-dibendaagoziyan akiing. Giin miinawaa gakina awiya naasaab gidizhi-apiitendaagozim, gaawiin wiin awashime gigichi-apiitendaagozisi. Dabasenimowin ezhi-waabanda'ang aw ma'iingan, ma'iinganag naadamaadiwag inawendiwaad inaadiziwaad okwiinowaad. Wiiji-anokiindiwag jiminno-izhiwebiziwaad.

MANAADENDAMOWIN

Manaadendamowin maamiinidim – giishpin waa-ayaaman manaadendamowin aapideg gidaa-miigiwen manaadendamowin. Gakina gegoo gakina ningoji gidaa-manaadendaan. Manaadendamowin ezhi-waabanda'ang aw mashkode-bizhiki. Mashkode-bizhikiwan mewinzha apane odaabaji'aawaan Anishinaabeg, gakina wiiyawini ogii-aabajitooon Anishinaabe wii-wiisinid, agwiwinan miinawaa wiigiwaaman.





GWAYAKWAADIZIWIN

Gwayakwaadizin giigidoyan miinawaa izhichigeyan. Gwayakwaadizin doodaadizoyan nitam, miinawaa awashime wenipanad wii-debwetawadwaa aya'aag. Gwayakwaadiziwin ezhi-waabanda'ang aw gaagaagi. Gaagaagi odaapinidizo ezhi-aawid miinawaa gaawiin wiikaa ogojitoosiin bakaan awiya waa-izhi-aawisig.

AAKIDE'EWIN

Aakide'ewin apii izhi-doodawadwaa bemaadizijig gwayakwendaman, miinawaa ji-minochigeyan gaye apii zanagak. Aakide'ewin ezhi-waabanda'ang aw makwa. Noozhe-makwa odayaanan aakide'ewin miinawaa zoongiziwin ji-gashkitoon zegizid miinawaa zanagadinig ganawenimaad onijjaanisan.





ANNO DOMINI
1874

1874
FALLENBACH



Legislative
Assembly
of Ontario



Assemblée
législative
de l'Ontario